

आकाशवाणी

1. प्रधानमंत्री नरेन्द्र मोदी होर 11 मार्च गी मॉरिशीयस दे द'ऊं दिनें दे सरकारी दौरे पर रवाना होडन।
2. संसद दे बजट इजलास दा दुआ चरण कल्लै थमां शुरु होआ'रदा ऐ।
3. दिल्ली सरकारै महिला समृद्धि योजना गी मंजूरी देई दित्ती ऐ जेह्दे तैह्त्त गरीब महिलाएं गी हर म्हीने ढाई ज्हार रपे दी माली मदाद दित्ती जाह्ग।
4. वित्त मंत्री निर्मला सीतारमण होरें आखेआ ऐ जे भारत, आर्थिक विकास गी बढ़ावा देने ते आपूर्ति श्रृंखला गी तगड़ा बनाने लेई अमरीका दे कन्नै मजबूत बपारिक समझौते लेई जतन करै करदा ऐ।
5. खेलो इंडिया विंटर गेम्स दा दुआ चरण अज्जै थमां गुलमर्ग च शुरु होआ करदा ऐ।
6. आईसीसी चैंपियंस ट्राफी क्रिकेट टूर्नामेंट दे अज्ज दुबई च खेड्ढे जाने आह्ले फाईनल मैच च भारत दा मुकाबला न्यूजीलैंड कन्नै होग।

<><><><><><>

PM Mauritius Visit

प्रधानमंत्री नरेन्द्र मोदी होर 11 मार्च कोला मॉरीशस दे द'ऊं दिनें दे सरकारी दौरे पर रवाना होंगन। मीडिया कन्नै गल्ल करदे होई विदेश सचिव विक्रम मिसरी होरें आखेआ जे मॉरीशस दे कन्नै भारत दे सरबंध सांझे इतिहास, संस्कृति ते केई सदिएं पराने ते दवै मुख्य दे लोकें दे आपसी सरबंधें ते तालमेल च निहित न। मिसरी होरें आखेआ जे मॉरीशस हिंद महासागर च भारत दे प्रमुख भागीदारें चा इक ऐ ते नेडमा समुद्री गोआंटी ऐ। उनें आखेआ जे 2015 च प्रधानमंत्री होरें मॉरीशस सब्बने आस्तै विसन सागर सुरक्षा ते विकास गी स्पष्ट कीता हा जेह्ड़ा हिंद महासागर खेत्तर दे प्रति भारत दी प्रतिबद्धता गी रेखांकित करदा ऐ। विदेश सचिव होरें अग्गे आखेआ जे भारत दी मॉरीशस कन्नै निग्गर विकास आली सांझेदारी ऐ। उनें आखेआ जे दवै मुख्य बश्कार पिछले 10एं ब'रें च सरबंध बड़े मते डूहंगे होए न। उनें आखेआ जे प्रधानमंत्री मोदी होर 12 मार्च गी मॉरीशस दे राष्ट्री ध्याड़े पर लगने आले कार्यक्रम च मुख परौहने दे तौरा पर शामिल होंगन। प्रधानमंत्री अपने दौरे दरान मॉरीशस दे राष्ट्रपति ते प्रधानमंत्री हुंदे कन्नै मलाटी बी करगंन।

<><><><><><>

Budget Session

संसद दे बजट सत्र दा दूआ गेड़ कल कोला शुरु होआ'रदा ऐ ते एह 4 अप्रैल तोड़ी चलग। इस दरान सदन दी 20 बैठकां होंगन ते 2024-25 ब'रे लेई अनुदान दी मंत्री ते विनियोग विधेयक पर बी चर्चा ते मतदान होग। एह्दे अलावा बैंकिंग कन्नू (संशोधन) विधेसक, तटीय नौवहन विधेयक-2024, त्रिमुवन सहकारी विश्वविद्यालय विधेयक, आव्रजन ते विदेशी विधेयक 2025 ते रेलवे(संशोधन) विधेसक दे कन्नो कन्नी विधादी कार्य पर बी चर्चा होग ते इनेंगी पारित बी कीता जाग।

<><><><><><>

Delhi Govt.

दिल्ली दी सरकार नै गरीब महिलाएं गी हर म्हीने ढाई ज्हार रपे देने लेई महिला समृद्धि योजना गी मंजूरी देई दित्ती ऐ। मुखमंत्री रेखा गुप्ता होरें अज्ज इक संवाददाता सम्मेलन दरान एह घाषणा कीती। उनें आखेआ जे अंतर्राष्ट्रीय महिला दिवस दे मोके पर दिल्ली सरकार दी मंत्रिमंडल दी मीटिंग च इस योजना गी मंजूरी दित्ती गई। उनें आखेआ जे इस योजना गी लागू करने लेई 5 ज्हार दक सौ करोड़

रूपे दे बजट दा प्रवधान कीता गेआ ऐ। महिला समृद्धि योजना गी लागू करने आस्तै दिल्ली सरकार नै इक कमेटी दा गठन कीते दा हा जेहड़ी अध्यक्षता मुख्यमंत्री रेखा गुप्ता होरें कीती। इस कमेटी च मंत्री आशीष सूद, परवेश साहिब सिंह ते कपिल मिश्रा होरे सदस्य दे तौरा पर शामिल हे।

<><><><><><>

Myanmar Elections

मयांमार दे सरकारी मीडिया नै जानकारी दित्ती ऐ जे फौजी हकूमत इस ब'रे दिसम्बर जां पही अगले ब'रे जनवरी च चुनां कराग। मीडिया रिपोर्टें मूजब जुटा प्रमुख जनरल मिन आंग होरें आखेआ ऐ ले चुनां निष्पक्ष होंगन ते 53 राजनीतिक दलें पैहले गै चुनाएं च शामिल होने लेई अपनी तसदीक आली सुचि पेश करी दित्ती दी ऐ। फरवरी 2021 च सेना आस्सेआ इक तख्तापलट च मयांमार दी लोकतांत्रिक रूपे कन्नै चुनी गेदी सरकार गी उखाड़ी सुट्टने दे परेंत एह पैहला चुनां होग।

<><><><><><>

Sitharaman – India US Trade

वित्त मंत्री निर्मला सीतारामण होरें आखेआ ऐ जे भारत आर्थिक विकास गी बढ़ावा देने ते बवस्थित आपूर्ति श्रृंखला जकीनी बनाने लेई अमरीका दे कन्नै इक मजबूत बपारिक समझौते दा जतन करै करदा ऐ। उ'नें कल मुंबई च इक्क पुरस्कार समारोह च आखेआ जे आलमी सतह उप्पर बधदे टैरिफ विवाद दे मझाटै, भारत गी अमरीकी टैरिफ दा सामना करने आहले मुख्यें थमां माल दी संभावित डंपिंग थमां बचने गितै चलाकी कन्नै गैहीं पुटिटयां होडन। सीतारामण होरें आखेआ जे भारत किफायती आयात पर निर्भर घरेलू उद्योगें दे हितें दी बी राक्खी करोग। भारत ते अमरीका 2030 तगर बपार गी दूना करियै 500 अरब डॉलर करने दे लक्ष्य कन्नै इक दपक्खी बपार समझौते पर गल्लबात करै करदे न। उद्योग ते बपार मंत्री पीयूष गोयल होर अजें कल गै अमरीका दे बपार मंत्री हुंदे कन्नै बपार मतल्लक गल्लबात करियै आए न। वित्तमंत्री होरें इब्बी आखेआ जे जीएसटी दिआं दरां होर घट्ट होडन ते टैक्स दिएं दरें ते स्लैब गी युक्तिसंगत बनाने दा कम्म तकरीबन अखीरे चरण च पुज्जी गेदा ऐ।

<><><><><><>

India US

भारत नै हाल च गै होए दे दपक्खी बपार समझौतें दे तैहत ऑस्ट्रेलिया, संयुक्त अरब अमीरात, स्विट्जरलैंड ते नॉर्वे ज्नेह विकसित मुख्यें लेई लागू अपने औसत शुल्क गी बड़ी हद्दै तोहड़ी घटाई दित्ता ऐ। सूत्रें मूजब, मजूदा समें च यूरोपी संघ ते ब्रिटेन सने होरनें भ्याल मुख्यं दे कन्नै बी इस्सै चाल्ली दी गल्लबात जारी ऐ। अमरीका दे कन्नै बी ऐसी गै चर्चा चलै करदी ऐ। जंदे फरवरी म्हीने, भारत ते अमरीका नै इस ब'रे दे अखीरै तोहड़ी बक्ख-बक्ख खेत्तरें आहले दपक्खी बपार समझौते दे पैहले चरण पर गल्लबात करने पर सैहमति व्यक्त कीती ही। प्रधानमंत्री नरेंद्र मोदी ते अमरीका दे राष्ट्रपति डोनाल्ड ट्रम्प होरें गल्लबात गी अग्गे बधाने लेई वरिष्ठ प्रतिनिधियें गी नामित करने पर सैहमति जाहर कीती। एहदे परैन्त, उद्योग ते बपार मंत्री, पीयूष गोयल हुंदी अगुवाई च इक भारती डेलीगेशनै इस हफ्ते वाशिंगटन दा दौरा कीता ते अमरीका दे वाणिज्य सचिव ते अमरीकी बपार प्रतिनिधियें कन्नै मलाटी कीती।

<><><><><><>

Khelo India Winter Games

खेलो इंडिया विंटर गेम्स-2025 दा दुआ चरण अज्जै थमां कश्मीर घाटी दी मशहूर सैलानी थाहर गुलमर्ग च शुरू होआ करदा ऐ। एहदे च स्कीइंग ते स्नोबोर्डिंग दिएं प्रतियोगिताएं दा आयोजन कीता जाहग। पैहले चरण च केंद्र शासित प्रदेश लद्दाख जेतू रेहा हा जेहड़ा इस चरण च अपने सब्भै खताब बरकरार रक्खने दी कोशश करोग। दुए चरण दा खेलो इंडिया विंटर गेम्स पैहले 22 थमां 25 फरवरी तक आयोजित होना हा, पर गुलमर्ग च बर्फ दी कमी दे कारण इसी अगड़ा पाना पेई गेआ हा। एहदे

शा पैहले, इ'नें खेड्डें दा पैहला चरण इस ब'रे जनवरी च लद्दाख दे लेह जिले च आयोजित कीता गोआ हा।

<><><><><><>

Cricket

आईसीसी चैंपिश्न्स ट्राफी क्रिकेट दे फाइनल मकाबले च अज्ज दुबई च भारत दा सामना न्यूजीलैंड कन्नै होग। एह मैच भारतीय समें मताबक दपैहरी ढाई बजे शुरू होग। गौरतलब ऐ जे इस प्रतियोगिता च भारतीय टीम अजें तोड़ी इक बी मैच नेई हारी ते ग्रुप स्टेज च भारती टीम नै न्यूजीलैंड गी 44 रंजें कन्नै हराई दित्ता हा। तोआई न्यूजीलैंड नै बी इक्कै मैच गी छोड़ियै अपने बाकी सारे मकाबलें च जित्त दर्ज कीती ही।

<><><><><><>

Football

इंडियन सुपर लीग फुटबॉल च, कल नॉर्थ ईस्ट यूनाइटेड-एफसी नै शिलांग च ईस्ट बंगाल एफसी गी 4-सिफर कन्नै हराई दित्ता। इक होर मैच च, मोहन बागान सुपर जायंट नै कोलकाता च एफसी गोवा गी 2-सिफर कन्नै हराया। प्रतियोगिता च अज्ज, चेन्नईयिन एफसी दा सामना जमशेदपुर एफसी कन्नै होग।

<><><><><><>

Punjab Arrest

पंजाब च कल सं'झां जेलें च द'ऊं बक्ख-बक्ख तलाशी अभियानें दे दरान अपराधिक षडयंत्र ते नशीली दवाइएँ दी तस्करी दे आरोप च द'ऊं वरिष्ठ जेल अधिकारियें ते 4 होरनें मुलाजमें गी गिरफ्तार कीता गोआ ऐ। इ'दे च होशियारपुर सेंद्रल जेल दे सुप्रीन्टेंडेंट, चार कर्मचारी ते अमृतसर जेल दा वार्डन बी शामिल ऐ। इ'नें लोकें गी अमृतसर ते होशियारपुर दिएं जेलें च कैदियें गी नशीली दवाईयें दी सप्लाई च मुलव्वस पाया गोआ ऐ। पैहले थमां गै सजायाफता त्रै कैदियें खलाफ बी कार्रवाई कीती गई ऐ। नशीले पदार्थ दी रोकथाम सरबंधी कार्यबल दे प्रमुख नीलाभ किशोर होरें दस्सेआ जे होशियारपुर जेल च जांच दे बाद एफआईआर दर्ज कीती गई ऐ। जांच थमां पता चलेआ ऐ जे केई कैदी, भ्रष्ट जेल कर्मचारियें दी मदद कन्नै नशीली दवाईयें दी तस्करी करै करदे न। इक होर मामले च अमृतसर जेल दे वार्डन गी बी कैदियें गी नशीली दवाईयां देने दे आरोप च गिरफ्तार कीता गोआ ऐ। अमृतसर जेल दे सुप्रीन्टेंडेंट हेमंत शर्मा होरें दस्सेआ जे कर्मचारियें थमां नशीले पदार्थ ते 63 जहार रपे नगद बरामद होए न।

<><><><><><>